

zu sein/ die man gar lang ziehen/ vnd denen kan: Vide lib. i. cap. 27.
in extracto maleficarum.

Auch giessen sie offtmals dem Viehe etwas/ oder begraben inen
ihr Teuffelwerck vnter die Schwellen der stelle/ wenn ein Viehe da-
rüber geht/ so erquimmet vnd stirbet es. Nun wil man wol sagen/
man sol an solche dinge nit gleuben/ wie ich selber von solchen Teuf-
fels wesen nicht viel halten/ so findet mans doch offt im Werck/ vnd
in der That/ daß gleichwol solch ding also geschicht/ vnd der Teuffel
ist offtmals starck in den Kindern des Vnglaubens/ darumb sol ein
Haußwirth mit seinem Weib vnd Kindern/ so wol auch mit seinem
ganzem Haußgesinde fleissig beten/ daß sie vnd ihr Viehe/ vnd Na-
rung Gott der HErr vor des Teuffels List/ vnd bösen schädlichen
Dücken gnedigst behüten/ vnd bewahren wolle.

Darnach vors andere/ so sol man auch anderer Leuten gutem
Rhat bißweilen in solchen Sachen mit nemen/ wenn derselbe nicht
wider Gott/ vnd sein heiliges Wort ist.

Denn es kan auch wol bißweilen ein Mensch dem andern mit
natürlichen Dingen schaden zufügen/ welchen mann mit natürli-
chen Dingen wiederumb begegnen/ vnd Widerstandt thun
kan.

Mizaldus meldet im vierden Centenario aphoris. 66. was
einer thun sol/ daß weder die Menschen/ noch das Viehe in einem
Hause bezaubert werden können/ vnd spricht: Dioscorides, vnd
Plinius schreiben/ daß die 3. Kreuter Alysus, welches Waltmeister
von etlichen genennet: S. Johannis Kraut/ vnd das Kraut Moly
in den Häusern auffgehengt/ die Menschen vnd das Viehe von der
Hexen vnd Zäuberungen/ bewahren sollen/ nicht anders/ denn wie
die Wolfesköpffe/ so an die Thore aehengt werden.

Dieses ist der warheit nicht fast Vnehnlich: denn was das erste
Kraut